

NOSEY DAAM JAANE



Sëriñ Daam Jaane mi ngi juddoo Tëngéej ci atum 1986. Mi ngi jànge Njaañug Njaga. Dëkk Tuubaa di fa jàngalee Alxuraan . Di ab waykat it ci Wolof ci gàttal.

Limat: 766938593

Email Dianedame9@gmail.com

XAAJ BU NJËKK BI:

- 1- Na Xol yi féex
- 2- Guddi
- 3- Mbëggeel
- 4- Sargal Sñ Xaadim Gëy
- 5- Lëndamug cofeel
- 6- Njukkal Sñ Xaadim Gëy




1-Na Xol yi féex

Daam Jaane

Jamonoy Asan Paateek bañuy way Njóoba laay
laa doon fowantoo way man ak ñoom Jàkka Njaay

Yéen doomi soxnay sěñ Basiir Lóo may ma fit
Afrig jógal jox baay Jagal ag gàngunaay

Ñi ma def ngalam ba ma xěy di nes-nesi tay ci way
Baay Saal Ture kaay fii te ràngal leen medaay



Saalihu Ture

Buma fàttalikoo Sěñ Daam ca daara ja saay jataay
way laa ko daan dundee man ak sama yenn gaay

Daan déglu sěñ Moor xam sa diine ci Làmp Faal
muy taalifal Maam Jaara Buuso lu taaru waay

**Ami Siise sos ciy muqtadab ay way yu saf
sëñ Fàllu Kan foto irtijaal di ko saamandaay**

**Ñukkub Lahat Ndonj génn gaa ña di jàngi way
Sëñ Ngund laa daa déglu ree bay xàqtaay**

Daam Jaane

**Sama kompulegsi ga deñ na ndax seex Abdu Ka
maa xëy jawub wolofal bi jënd la mbër di jaay**

**Baay góor gi déglul Mustafaa réew mee jaxoon
sëñ Làmp Mbàkke di tagg Daam may ngën ji waay**

**Suma dee jinaas tay baay Lamiin a ma jox cereem
kiy fëgg saay téeree waral ba ma am ngañaay**

Saalihu Ture

Sëñ Seexunaa Gàннаar ci Nday Alima a taxoon
ba ma teey a teey ci jigéen ñi tépp na dégg aay

Sama xel xalam kaanaa ki kàkk bu Maysa Faal
ibnul Amiin Faal fëll indi fi lakk daay

Tax nañ ba way jaxasook dereet sama tay jile
bu dutoon ak ñoom sama xel mu ñor mi du waaj a xaay



Fuma yaali dóor sàbbaal Imaam ja mu soñni nguur
yoon teggi tuumay Fàllu Kunta mu ñibbi waay

Tay-taylu naa bañu teg ma dof terewul téyeel
sëñ Baara Gëy Mahmóodu doom ja mu jàngi laay

**Kuy tukki laajal sëñ Abóo waa jam dajeel
yoon week a tar suma doon ragal дума jéggi raay**

**Li ma gént a gag loo Bàmba Lóo ak Seex Silla muy
Doktooru Lóo ànd ak Imaam Jóob dellu Ngaay**

Saalihu Ture

**Abdul Ahat Ñañ ñag na làkk wi gépp wet
bàkkal na réew mi ne jaasi waay jaa mas la daay**

Daam Jaane

**Mbaam yaa ngi jottali cant ben Faadl ci mbay
ag ñàkk dug bon Fàllu Si ak maam Cerno Njaay**

Saalihu Ture

Laajteel ma Sàmba alaar ci Seex Awa Bàlla Faal

Buso Abdu Xaadar ëppalam laaj nay detaay

Marxiy marax leb naa ko ngir imisooy ikaab

ak jant beek bennoo efem billaay wallaay

Daam Jaane

Jaxasey pitaale di dammu bahru ba def lu jub

sama tur ci seen àlliwóoy mbatit éro laa ci waay

Li ma tarde reer ngir koj ikaab imisoo xalim

Faatoon gi ñëw ka ma domp daaw ren moo ma raay

Saalihu Ture

Génnee ña nëbbu te feeñalaat peru way ba doon

bëgg a réer ñu formey Mbër yu mag jox leen medaay

Daam Jaane

Xalimag wurus durrun nasiim ay umsiyaat...
a ma yóbbu Kawlax ak Difoonse ak Géejawaay

Saalihu Ture

Ñoo yokku xemmemtéefi ndaw ñi ci waar wi tay
dekkal donoy suñu mag ña doon suñu delluwaay

Daam Jaane

Wolof Ak Xamle

Root nan ci teenub Kayre mbóotum Baabakar
bayreek xorom ngay yëg ci way yi ñu tagg yaay

Saalihu Ture

Seex Sàmba Jaara ak sëñ Musaa duy sun bagaan
Bamu fees ñu tiim taawook i caat aay dékk mbaay

Daam Jaane

Yar gindi xupp ak yedde waar yee kuy nelaw
liy tàkk fay bu ci boole way is naafë daay

Saalihu Ture

Fuñu fëlle rekk mu nooy ba gaa ña di coow ñu far
fëllewaat feneen di ko sante nday di ko bàkke baay

Daam Jaane

Wolof Ak Xamle

Dañu raam ba tas dox jéggi jéego yi joggi dég
dox nan ba xéewal agsi yay nan sant waay

Saalihu Ture

Sutura ak teraanga ju sax wér ak raw guddu fan
fés feese barkeek bayre buñ doon benn waay

**Buñu ruur te buñ réer buñ waroo buñu wor xarit
kuñu raccalub laaxum bañeel bumu am cifaay**

2- GUDDI

**Mbalaani niir ya bu muuree, jent sàng safax
Bëccëg ga taggu timis, maay samp dënd di buur**

**Xaftaan bu ñuul ni këriñ, am tupp-tupp yu weex
Mooy col ga ag ndaama laa, as ndiir su gàtt ma réer**

**Xaftaan bu ñuul la ma sol, am tupp-tupp yu weex
Ag ndaama laa fukki waxtu ak benn rekk ma réer.**

**Gaaw lool ci way bég i xol, soof cam su nekk ci tiis
dal yewwu am sutura, xam lépp bàyyi ci biir**

**Way baax ya sopp ma lool, saay-saay sa jàppe ma waay
ñeey jaamu ñee dëkke jëf, ñaawtéef ya lépp ma muur**

Saag door la jinne di jóg, lal ay pexeem tër i fiir
Ku farluwul tëye doomam, njuuma sànni ko xeer

Ngelaw su sedd sa moo lay soññ gaawtu xoyet
Jafal sa and ci mattug goongo gëtt yu piir

Ginaar yi tàbbi ngunu, njugub yi génne ci lëm
Lippaaxon ay gunge jeeg, bay waaj a yakkiji reer

Muus jóg di rëbbi jinax, xérjéjji lang ci looy
Gee jàll yóbb safaa, wittar ñu tàbbi ci biir

Bànnex ci néegi juboo, naqar ci néegi safaan
Am biir yu feese ndawal, am yoy mbaxal la ñu sóor

Suñeel yi raam leru ñag, rungug gaña a ngi sa waañ
xaj yaa ngi yuuxu ca kaw, ay ngooxi mbott di riir

Yoo yewwu yee xorondom, gëmmentu dal di nuyoo
Gént ay sa gan gi la wax, xibaar yu lënt sa yuur

Leeg-leeg mu neex ba nga bég, leeg-leeg nga yuuxu ca ngir
jëmmam ju raglu ja ànd ak bëñ yu gudd te xuur

Fasuw sijaada gu suur, laabuw kurus yaru tur
Njaabal ci kursu wareefi jaam ba nammati Buur

Mbaamum fétal mu ñu sëf, jaasiy bajantu ci bew
war say wareef weri fit, def jom toj ak tëb i miir

Ñii tëdd seen weti way-jur, sàngu seen sëri ngor
Ñii sol lu gàtt fasoo, wànteeri seen céri biir

Jokkoo ba guddi gi xaaj, gàmbaal ba séq yi sab
Kee xaar jëkkër ba nelaw, kee bëtt ñag wuti góor

Sàcc ak wëyyook wagaboo, bàndeek sulaar yi ci baar
Yaaram sëriñ ku ñu rus, tàneef ci cant yu foor

Rombante mbindeef yu wuutey jikko, ak melokaan
Wuutante kawkab ya xuus, seen burju feq di leer

**Ñatteelu xaaj ba xaran, yay riir ci dënni xureet
piccum tinook nangu ñaan, toŋ fépp ken du ko diir**

**Bët gëmmu ruu yi di xool, tëraayu xëbru ëllëg
Néew tëddi morgo xajal dooñkat bi am ganu liir**

**Jàppaan gi jàpp sa cuuj muy ciib, nga tëb ne bërét
Baay Xaadi nodd fajar, bët set sa yaay a janneer**

**Kiiraay la wuññiku na, looy bañ mu siiw bu ko jëf
maay guddi ay li ma lëm, lëndëm du muur sama leer**

**Dan maa xarook sutturaak ug maandu noppi ci dal
Yiw mbaa safaana ci yam, loo jëf ci man дума weer**

**Kum soob nga jàppe ma sën, ndax celli mag du nalaw
bul foog ne umpale naa, liy gontu xew sama biir**

**Kër-kër du woon sama mbir, dalloo ma yékkati woon
Ker laa gu dëll te yee, foo fàkk man nga fa goor**

Siiwal du woon sama mbir, yeetee ma yékkati woon

Liy xew ci bëccëg a raw, ëllëg la lépp di leer

Ay xaaju guddi, bu jekkoon jekki nekk bëccëg

bis pénc sax du ko dab, cig xumb ak bari riir.

3- Mbëggeel

Mbëggeel a sóob ma ci gottub

Miseer bu ànd ak i tar-tar

Xiinam wa dotti ma waamew

Nammeel gi sàng fi saay cër

Xalaat saxal sama biir xol

fulóor gu fees ak i car-car

Meloom wa dëkk ci soppee..

ku bis bu nekk ni kàkktar

Leeg-leeg mu roos ba ma foog ne
am ramatoo ni fi fër-fër

Mu dellu weex di ma gëmloo
tóttóor a tàgg sa biir kër

Yii saa mu gel niki lolli
yii saa mu naate ni ab dër

Yii saa mu wert ni ndam-ndam
yii saa meloom niru bàqaar

Leeg-leeg mu xëpp ma jàmm ak
jubbam wu jekk wa nib per

Kontaan ga soppiku sarwet
saa góomu xol bi mu tag cor

Leeg-leeg mu tàyyi ni toq
xëy am cawarte ni war-war

Leeg-leeg ñu ànd di guutu
tambaalu geewe ba fajar

Di sab di bàkku ni naatug
rajab gu mujj ji ci tar-tar

Leeg-leeg mu yakk ma bannex
bu yaatu ub ko ci naqar

Leeg-leeg mu dij ma ca naaj wa
may jooy mu uuf ma ci ron ker

Yii saa mu ràng ma càqub
xalaat yu sell ni gànjar

Yee saa mu ténke ma coona
saa xel mi yendu ci kër-kër

Leeg-leeg ma tàbbi ci firdawsi
naan di sangu ci am njar

**Dimbaane meew muñu rax lem
sërxaal ca soow ak i suukar**

**Muy ndaatataar di ma reetaan
leerug bëñëm ya di kàbbar**

**Ki tax ba jant di leeral
waral jamaa kawe ab cër**

**Ku gis ko guddi du gumba
wettaa wetuw mbég a koy dar**

**Jubb ub Musaa du ko góndi
ngoob rekk lay nosal iy per**

**Ci man la barde du ay dóor
ndóbin ga sab na ko muy bér**

**Saa tipp-ripp mi gàcceel
na putt End ca xaysar**

**Sawtus safiir duma yëngal
baatub Daawuut la ma Buur cér**

**Pitax mu taaru mi naawal
ci jawwi kaw-kabu ashër**

**Saa ngalle saa picci pal-pal
fum tàgg teggi fa njàqar**

**Mooy tëgg xel mi di wëndeel
turam la xol bi di sikkar**

**Fan laa jëm ak dexu mbëggeel
naanam ga yokk na saaw mar**

**Mbëggeel a takku te sakkan
ku bëgg nit na ko waggar**

**Cofeel gu dëggu du yomb
ku bëgg piir dinga bég mer**

"I love you" sama tàngal

Jinjeer ci faj li ma càqar

Sa mbégte mooy sama bàñneex

sa mer ma doon sama naqar

Mbéggeel a sóob ma ci gottub

nooflaay bu ànd ak i tar-tar.

Wolof Ak Xamle



Sarku Xam-xam

4- Sargal Sëñ Xaadim Gëy

Gëy Njoora Gëy ñaaya yaw, téereb Boroom bi nga def

Am xëy ku lay fakktal, daa repp mbaate mu dof

Yan bañ yanoon mbër ya woon, téeeñ baa ngi yaa ne ko cas

Kuy tee nga dëngëñ di wéy, am mbaam la dees na ko sëf

Ku doomi Bàmba di yéem mbindam ba koy terali

Sag suufe faat na asal mosleen ko, xam li mu saf

Kenn manta lim ñi nga def, sëñ daara tay ak i kaan

sun taal ya doon bëgg a giim, ca Njaañ e yaay ki ko ëf

Doo bërgal ub ndonga yaw, doo boddi mag walla ndaw

Gëy ràggalóo, ruuralóo, reggal nga yékkati tef

Xeet yépp am nga ca kaan, lawbeek i géer a ci yam

Ab naydo mantil a tee, ngay xëy di bay wile lef

Tërub xol ak xel mu nëb, gis-gis bu gàtt bi ngeen
Koy xoole tay dafa doy, def ngeen lu yées li mu def

Kuy jéng baay tëj ci kaaf, tey maas kurã ak a dóor
Looy bañ ku jéng ku daw, ngeen mel ni mbóot yu ñu nef

Jéngub noteel bi ñu leen, ràngal ci ngeen war a wax
Te bàyyi daara mu toog, xam ngeen ñi ngeen war a ñaf

Jaay suuf si jaay peterool, jaay nit ñi sànni sa ngor
Jaayal ba jaay li nga wuuf, mee bàyyi nook sunu yëf

Kuy bañ mu jéng joxal, sèñ daara bii la mu moom
Njaanleen mu wadd te ngeen, jóg jëf li ngeen war a jëf


Du seen moroom te du seenub, nawle yeen a ko tay
Walleen i nàkka te muñ, seen ñay wa nee na ko tëf

Misyoo la yor matagul, daaraam ja dees na ko taax
Seex Murtadaa a ko sos, ñeexum cofeel la ko sif

**Daam Jaane baayu Kariim, Xaadim Gëy ay ki ko yar
Ak mbër yu kenn du lim tee ngeen a jëf li mu jëf**

**Buur Yàlla Yàlla na tër, kuy noonu daara ci suuf
Labal ko ciy fitna ak, kër-kër këram ya di jaf**

**Féexal sëriñ daara bii, ndax ag jotam bariwul
Ab ñaydo mantil a tee, muy xëy di bay wile lef.**



5- Lëndamug cofeel

Lëndamug cofeel gi ma tàbbi, tax na ma gont war

Mutafaahilun ji fi ñépp, taamu ci tagg mbër

Tegu yéene way yaru tagg bàkk wu saf xorom

La ma koy cawee di ko rëpptaal da ma dib gawar

Li ma yeex a jóg terewul ma jiitu ca tuur ba ndax

Wile naaru-góor du fi dàqe muk, ci kursu par

Li ma naal a bind ci sibtu Bàlla ba tax na tay

Keru xol bi féex, cari xel mi naat na te daa ji far

Ku fi doon wayantu, na teg xalim ga te ñëw awu

Sama géer gi fawxa na gépp géer fa mu làng a bir

Ku fi doon tēbantu na dal, te ngax yi ni nemm cëy

Mbëru mbër yi gétti na waada, cëy ak a neex a far

Sàmba yaa di ngaan nañu tekki, cuur yi te jox ko ndam

Jaratul limaale du maasu ñii fële lañ ko ber

Galanub sëriif la ko Buur tëggal, nattu yoy Yonnen

La ne cas di wéy, bëtam aŋ ca gaaya fi woon Badar

Aka neex a taas, aka neex a jiin, aka yomb a kañ

Aka jar di bàkk ne géeku may ya du nëx du fer

Sëriñub njariñ ba ñu daam, ngëneel ya ñu daa xaroo

jëfi Soxna Jaara ja Yàlla nangu mu law di wër

Aka teel a sóobu ca ngir mu sell ma roy Yonnen

aka teel a dab ña ko jiitu woon te fi daa sikar

Fa nga jaare Yàlla la gaa ña jiitu di wër ba tay

gisaguñ sa kem amutoon du am ba ba dun bi far

Ñime coona way, yanu nattu tiis aw sun balaa

Tinu teete taawu nu taaralaat sunu bépp cér

**Gabonj ak Konaakiri Bàmba kuñ la fi dendaleel
jëfalul ñoñam ña lu tol ne baat ya nga tont Ndar**

**Ma ne kon sarax nu te yiir nu yaw, mi fi gën mbalaan
Bu nu àppe njuumte yi démb tay lunu moy nga far**

**Ba la waa Garàmbasa diggi géej nga nu xettalee
Ba nga daane noon ya ca Jéewali la sa ndam ya wér**

**Di ñu sànge sag suturaak i may yu ñu dul dara
diñu sargal it suñu biir i nawle di fanq mer**

**Talatun fayantu ni Daam a faj la nu metti woon
Dexi kawsara ay sunu naanuwaay lu nu namm xer**

**Asakaa ki ay sarax ak ngumeen la nu daa dundee
Bamu ñibbisee la fi nqonji jeex nu ngi afra xar**

**Xalimaam du jaawale mag na runge du gag du naax
Àlliway Boroom bi ca kursuyun fa la daa nafar**

Mbindam ay gësëm aras ak kenoom ya di xacci xol...

Y di dàq ñàkk di dindi réer ak a sippi lor

**Tawat ak balaa musiba ak i ndog lu nu jub mu fé!
Dërëm ak ngërëm daraja ak i ndam di nu dëkke wër**

**Asamaan du tiimati gor su baaxe ni Baayi Bas
Lewet ak nètëx nga mu boole teewu ko mel ni gar**

**La nga daj Ndakaaru ca néeg ba jar na ku nekk jooy
terewul nga wéy delluwóo ginnaaw ku la sédd ngor?**

**Ba nga nee fa jóox kero ràbb jam na sa ndëggu sar
Terewul nga teg ba ca des, nde jom la la Yàlla xër**

**Masuloo ne uh te sa xol du nux-nuxi bay tawat
Sunu tedd yaay ki ko jënde coona bu yàgg a tar**

**Dunu am sa fay lu dul ñuy jubal ak a jaamu Buur
di la roy ci sunna su sell jëf di ko teg fu wër**

Jote nan la nday jote nan la baay jote lay nijaay

Jote nan la far sunu lépp gee bëccëg ak fajar

Ku la séddu raw te du fuuy du bew ku la am texe

Ku la teggi réer ku la foñ suur lu mu sóor mu dar

**Ku la fat ci biir xolam ak xelam nga di ay céram
lu mu yóotu jot lu mu songu daan lu mu jàggi tër**

Ku ñu ber nga uuf ku fi loof nga wudde ko ay ngërëm

Ku ñu xeeb nga aj ko ca kaw mu far kawé ñépp cér

Na nga ful nu yaw mi nga xam ne mbaax a ngi far ci yaw

ku la denc féex ku la jënd bég ku la jaayu jar

Ku la sëmb tooye na may yu ànd ak i jagle kon


Nee ma jàkk teg ma ca gàngunaay gi fi ñii di wër

Taxawal te xatmu sa way wi géej amul ab yamu

Tëralal xalim gi te ñaan ca barke ba mujj wër

Texe njub teraanga ju sax fileek fa ñu jëm ëllëg
Darajay Yonnen ba mu daa xëyal ba mu def ko mbër

Salawaatu Rabbi hallayka yaa sëyyidal basar
Maha aali feek muritiy Sëriñ bi di waaj safar



6- Njukkal Sëriñ Xaadim Gëy*

Ahlan wasahlan watarhiiban ci sun ëtti xol

Ndokkeel la day lu nu war, Géy Njooro Géy ñaayaa

Siggil nga daara yi ak, mbooleem lu taq ci ñoom

Saw tagg daj na Kajoor, Saalum ba dem Ngaayaa

Say soppe bég na ñu tay, sa noon ya pérdi nañu

Xuraan a ngay sigaree, muy saar ak iy aayaa

Yaa aw fa góor ña awoon, moo tax nga daj la ñu daj

Sabrun jamiilun a lay ràngal fi aw laayaa

Kuy rëbb day làqatuy, bóof ak di diir ak a raam

Jawfal faraa mi nga tër, yombul ci bii ñaayaa

Yaa rëbb Yàlla ci xuus, gottub xuraanu bi def

Pastéefu ak fetaliy sox wal ya ray gaayaa

**Diiróoy pitax ak i naat, dóoróoy jinax ak i wel
Segg ak tene ya nga fees, jam gaynde mbër Njaayaa**

Sab donga wecci na junniy, fóore yaa bari ay..

Baasiin yu raw sèriñub ñay sàmm i nag mbaayaa

**Géttub ngéneel ci nga yar, ay yëkki garmi yu duuf
xëccoowulóok Ardo meew, yaa soow lu suur paayaa**

Yërmaande ngay yeewe ndaw, teraanga ngay gawe mag

Kersa ak lewet ba ñu koy kàbbar nga doon taayaa

Buural wéyal doxalal, sam mbay rafet na te set

jekkil ci sag gàngunaay, tey xelli àttaayaa

Laf cat sa tukki bi nay, sun yokkuteg daraja

Njëggum Unnayni ma feeñ, léebam wa naaxsaayaa

Boolook jullit yi ci am, ak bépp xol bu ci tooy

Nay ciggiteg daara tey, suuxug ku taal daayaa

**Jaaraama waa daara ñii, ñooy gar di garmi yu set
Seen xol ya Buur a ko fees, duñ dacc duñ daayaa**

**Fuñ wokke diine ñu jóg, fu Yàlla woote ñu dem
Tiituñ rafuñ takk-der, buy boqi ngànaayaa**

**Jub jéf ndigal moyu tooñ, yar yiw yéwén ñime dal
Ñoo mag toj ak yàq kon, bal baa ngi ci seen kāyaa**

**Busraa li Njaañ Njaga seenuw, tagg law na fu ne
Naw yiw di seen xalima, wërsëg di seen daayaa**

**Bijaahi jàkka ya ak, daaray xuraan ya fa ne
Yal nañ nu dolli ngëneel, sun xel mi bum naayaa**

**Bijaahi xabru ya ak, jumaa ja Bàmba siyaar
Fu bàrke nekk na dal, kiy bind wii aayaa**

Xéewal wér ak gudd fan, wëwsëg wu yaatu te lew

Nay wal fi nun li fi ak, jullee ngi am taayaa

Daam Jaane baayi Kariim, Xaadim Gëy ay ki ko yar

kuy noonu daara ci way, lay xotti say caayaa.

Aji-bind ji: Imaam Jóob

Aji-topp ji: Seex Lóo

Ngir bokk ci mbootaayug WAX (Wolof Ak Xamle) jokkool ci limat yii 76 317 83 17 / 78 426 61 35.